

# Powšitkowne WOZJEWJENJA

njedźelu, 13. decembra 2020

## Žane wusylanje kemšow w serbskej rěči

Serbskorěčna Boža mša so tutu njedźelu, 13. decembra, jako livestream w interneće njewusyla. Kak to přichodnje budže, so hišće wozjewi.

## Přiležnosć k swjatej spowědži w Róžeńće

<b>sobotu, 12. decembra</b> 17.00 – 18.00 hodž.	farar Michał Anders w kapali farar Beno Jakubaš na chórje farar dr. Michael Kleiner we wěži
<b>wutoru, 15. decembra</b> 18.30 – 19.30 hodž.	farar Michał Anders w kapali farar Tomaš Dawidowski na chórje farar dr. Bernhard Dittrich we wěži
<b>sobotu, 19. decembra</b> 17.00 – 18.00 hodž.	farar Michał Anders w kapali farar Tomaš Dawidowski na chórje farar dr. Bernhard Dittrich we wěži
<b>wutoru, 22. decembra</b> 18.30 – 19.30 hodž.	farar Michał Anders w kapali farar Šćěpan Delan na chórje farar Gerat Wornar we wěži

Přeco sobotu je do Božeje mše za lud a kraj, kotraž so we 8 hodž. zahaji, přiležnosć k swjatej spowědži. Sobotu, 2. kaž tež 9. januara, pak wona w 17 hodž. njebudže.

## Adwentny nyšpor w swójbje swječić

Worklečanske džěćace dekanatne dušepastyrstwo je za kóždu adwentnu njedźelu nyšpor spřihotowało, kotryž móže so w swójbje swječić. Namjet wotběha budže aktualnje na internetowej stronje [www.posol.de](http://www.posol.de) wozjewjeny.

## Kubłanski personal w Radworju trěbny

Katolski serbski džěćacy dom „Alojs Andricki“ w Radworju pyta kubłarku abo kubłarja za městno dotalneje kubłarki, kotraž je so na wuměnk podała. Městno ma so tak spěšnje kaž móžno wobsadzić. Štóž ma zajim abo prašenja, njech so na wjednicu Andreju Henichowu pod telefonowym čisłom (03 59 35) 2 07 17 abo z mailku [andritzki.kinderhaus@t-online.de](mailto:andritzki.kinderhaus@t-online.de) wobroći.

## Nowa płacizna

Po wosom lětach so płacizna za Katolski Posoł wob lěto wo dwaj euraj zwyżi. Wot 2021 wučinja lětny abonement 27 eurow, z póstom 54 eurow.

## Turněr njebudže

Koparski halowy turněr wo pokal Towarstwa Cyrila a Metoda z.t. so spočatk noweho lěta koronoweje pandemije dla njewotměje. Po tym zo wojowachu mustwa w lěće 2000 přeni raz wo tutón pokal a potom stajnje w zymje, so wón tónkróc přeni raz scyła njewotměje.

## **TCM podpěra dušepastyrski projekt fararja dr. Dzikiewicza**

Dary za Pólsku hromadža so hakle klětu

Towarstwo Cyrila a Metoda z.t. (TCM) chce ze swojej akciju „Łužica pomha“ tónkróć projekt fararja dr. Daniela Dzikiewicza, kotryž je dobre džewjeć lět w Chrósćicach skutkował, financelnje při twarje wosadnicy we Wojdatach podpěrać. Tu trjeba wón, zo by w swojej wosadže z mnohimi młodymi swójbami – lětsa mějachu 80 přenjawoprawjenskich džěći a runje telko křćeńcow – porjadnje pastoralnje skutkować móhł.

Wobšěrnje je projekt w Katolskim Posole z 25. oktobra wopisany. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Litawska“ přepokazać. Štóz sej darowanisku kwitowanku přeje, měł swoju dospołnu adresu zdžělić, dokelž njesteji wona na přepokazance.

Předsyda TCM Jurij Špitank skedźbnja na to, zo towarstwo w akciji „Łužica pomha“ koronoweje krizy dla lětsa nazymu za Pólsku dary njehromadži, kaž je wone to zašle lěta činiło. Dalokož móžno, ma so to klětu nalěto nachwatać.

### **Onlinowy forum: Kotry wliw ma korona na Bože služby?**

Na přichodnym zarjadowanju wuchodoněmskich cyrkwinskih wikow „die pastore!“ móža so wšitcy zajimcy online wobdžělić. W rozmołwje wutoru, 15. decembra, wot 18 do 19.30 hodź. wěnuja so prašenju, kotry wliw ma korona na Bože služby. Při tym póndže mjez druhim wo pro a contra přenošowanja Božich službow w interneće. Rozmołwnaj partneraj staj profesor dr. Jochen M. Arnold, kotryž wuwučuje w Hildesheimje a Lipsku, kaž tež profesor dr. Benedikt Kranemann, liturgiski wědomostnik w Erfurće. Přihladowarjo móža so přez chat prašeć a sobu diskutować. Link k přizjewjenju je pod [www.posol.de](http://www.posol.de) podaty.

### **W Hejnicach trjebaja pomoc**

Na zakładže wuskutkow tuchwilneje koronoweje pandemije je situacija w klóštrje w českich Hejnicach jara napjata, wšako njejsu tam žanežkuli zarjadowanja móžne. Podobnje Smochčanskemu kubłanišću swjateho Bena wužiwa so klóšter jako kubłanski a putniski centrum a leži na kromje Jizerskich hór. W Českej pak njedóstawaju tajke kubłanske domy kaž w Němskej statnu a cyrkwisku podpěru.

Pod třěchu Ekumeniskeho tachantskeho wobchoda z.t. (Ökumenischer Domladen Bautzen e.V.) eksistuje nětko Kruh přećelow a podpěraćelow Hejničanskeho klóštra. Štóz chce česki kubłanski dom rady podpěrać, móže swój dar na towarstwowe konto tachantskeho wobchoda pola Ludoweje banki Drježdžany-Budyšin pod hesłom Kloster Haindorf přepokazać: IBAN DE33 8509 0000 5626 2110 05. Darowaniske kwitowanki towarstwo wustaja. Wšitke pjenježne dary přepoda wone direktnje do Hejnic.

Znaty a woblubowany je klóšter tež w Serbach. Hižo časćišo putnikowachu wěriwi z Łužicy do tamnišeje hnadowneje cyrkweje. Mnohe lěta přewjedžechu w kubłanskim domje tež serbske chóry swoje probowe lěhwa, wosebje prawidlownje přebywaše tam chór Budyskeho Serbskeho gymnazija.